

# Di emotzióngen

Soin kontént, lachan, haltn gearn, gäuln, soin zorne, schemense, stian letz, vörtse, zittarn, inkian, darschrákhán; machtz toal von lem von mentsch. Hintar aniaglaz von disan sachandar machtze a situatzióng boda mage khemmen vor üs, vo innzalt odar vo auzzalt. Schaugante à a khinn in di biage parirtz ke 'z redet pinn oang, ziagante 'z maüle, 'z mövartze pinn hentla un pinn schinkhla. Un balbaraz nemparn, steabar gebundart ázoschauga dise naturálege espresióngen. Vil vert anvétze únsar laip rispúndart pitt ploaz emotzióngen azta uminum ús izzese gemacht darzúar eppaz peng a kausa. Allar únsar laip nimp toal, balda 'z hértz heft à zo mèkka mearar, dar atn khint sberar, an unrue pintetaz. Balbar soin traure atn únsar mustátz allz schauget nidarbart, dar viso fíttze, sobia vor di aksln un di arm, allz lazztze gian. Haut zo tage vor groaze situatzióngen (virus, kalamità, teremótt) boda vürvángen khnöpf laüt odar vor khlummane situatzióngen, azpe ma redat ke 'z magat auzvalln zo bokhénna in bolf odar in per, innzalt hörbar ke bar khemmen getrakk zuar dar vort un asó hörbar an

zittar, bar khemmen ploach, pensàrn zo inkiana; in aniagladar kaso pensàrbar nètt guat. Groaza un khlummana vort. Únsar geböll iz nètt lai hërta boróatet abezodarléscha ditza getüana. Ándarst khinta vür in an mentsch boda heft di votze, heft à zo hoka di geböll un di mimika von snabl hám bintsche zo tüana. Allz darléschtze abe balda dar zorn iz zorgànt. Èkko asó nütztma di emoticon - emoji di sèlln snabela insinamài atn tschellulare balma hatt verte zo schraiba azpe di disénje von höln. Dise soinz di maskere von lem, un aniaglaz mentsch nütztze azpe pezzar 'z geaten destrat. Di schaulan lazzanse lai áschaung sovl azpe di schümman. Asó in dise zaitn bobar lem, izta eppaz bodaz auzziaget, un iz ke bar mochanaz nètt diféndarn azpe di mánnen vodar preistoria. Ma ditza beràndre laüt von djar 2020 hámz vorgèzzt; asó mèkkpar pinn vaüst, bar zoang di zenn; 'z parir ke daz letz mochat dekhan daz guat. Azma áschauget zèrte progrém in televisióng parirnsa alle narrat. Alle genoatn baibar un mánnen hokn, soin gebónt zo djukha pinn hent, lai eppaz zo reda o zo kontàra boda iz



10:24

10:24

auzgevallt. Allz ditza abegeléara in nètz pazzt neméar. Gántze trasmisióngen gemacht pitt getóatate laüt, insinamài di altn laüt boda lem alúmna in di háusar mochan zornirn baz ázoschauga, pezzar di dokumentàri von vichar boda lem in natür bodase komportàrn pezzar baz di laüt. 'Z lem iz a gántzez rècht. Haltn gearn odar patirn. Khemmen auzgetrakk odar soin kondanàrt. Un balda a tiabas a bötta valtz auz ke a baibe khinnt zo mengla bartz hërta soin daz sèll bosa auzpaitn afta sèll ler karége bosa hám gestèllt in alle di offtlesche pòst..... pinn khindar afti schoaz darzúar. Furse si o hatt genützt kissà biavl vert di snabela zo rüava hilfe in soi hërft. Disar senjàl o macht soin toal, zo geba votze berda neméar hatt votze.

A.G.

Istituto Cimbro  
Kulturinstitut Lusérn  
Tel. 0464-78.96.45  
info@kil.lusern.it  
www.istitutocimbro.it



## KONKÛRS

Dar Kulturinstitut Lusérn macht bizzan ke dar hatt in sint auzonemma a mentsch alz Assistente amministrativo contabile. 'Z izta zait inn z' schraibase fin mittartage von vraita 3 von abrèl 2020. Zo bizzasan mearar makma árüavan in KIL attn nummar 0464 789645.

**CONCORSO PUBBLICO, PER ESAMI, PER L'ASSUNZIONE A TEMPO INDETERMINATO, DI UN ASSISTENTE AD INDIRIZZO AMMINISTRATIVO CONTABILE. CATEGORIA C, LIVELLO BASE, 1ª POSIZIONE RETRIBUTIVA**  
Il termine ultimo per la presentazione delle domande è fissato per le ore **12.00 del giorno 3 aprile 2020**. Il testo del bando di concorso è pubblicato anche sul B.U. della Regione Trentino-Alto Adige-sezione concorsi- n. 9 di data 4 marzo 2020. Il testo integrale del bando di concorso e il fac-simile di domanda sono reperibili sul sito Internet dell'Istituto. Ulteriori informazioni possono essere richieste all'Istituto cimbro-Kulturinstitut Lusérn (Tel.0464/788019 - fax 0464/788201)

## AN LIBAR ÜBAR LUSÉRN

Dar Kulturinstitut süacht a mentsch boda mochat schraim an libar übar Lusérn. Zo tüana ditza makma schaug bazta hám geschribet ándre un mocht leng panàndar allz. In libar bartnda khemmen gelekk o schümmane foto, alte un naïge. Berdasen hörart zo tüana ditza mage schraim in Kulturinstitut un schikhan soin curriculum vitae pittnan khurtzan prodjèkt khódante bia dar machat di arbat. 'Z izta zait innzogeba di domànda fin di **zböve in tages von vraita 27 von lentz 2020**.

# Zait vor üs in disa sber zait

*In questi giorni di chiusura delle vostre biblioteche, potrete continuare a leggere accedendo al prestito digitale sulla piattaforma MLOL (MediaLibraryOnline), la più grande collezione di contenuti per tutte le biblioteche italiane. Per accedere dovete essere iscritti ad una biblioteca pubblica del Sistema Bibliotecario Trentino e avere un account. La biblioteca di Luserna è chiusa al pubblico ma la biblioteca è in servizio e, per avere informazioni, potrete scrivere una mail a [luserna@biblio.infotn.it](mailto:luserna@biblio.infotn.it). E, visto che la raccomandazione è quella di stare a casa, vi consiglio un piccolo capolavoro edito da Keller, "Perché il bambino cuoce nella polenta" della scrittrice romana Aglaja Veteranyi. Un viaggio attraverso la vita, una storia magica, un libro straordinario consigliato anche da Dacia Maraini.*



In di tang boda iz augespèrt lai allz, di bibliotèke un di schualn o, un bodaz khint gevost alln úsàndarn zo stiana huam, nètt zo giana ummar azma pròpio nètt hattzan mengl umbrómm maristschàrt zo darkránkha un zo macha darkránkhan di àndarn o, hánne gevuntet bichte un dèstar ziang ar zo lesa djornél un libadar vodar piattaforma digitale MLOL (MediaLibraryOnline). Ma mage lesan di tagesdjornél un ploaz ándre djornél, darzúar soinda ploaz libadar vor alle, khindar un groaze. Zo giana drinn, mochtma soin inngeschribet in a bibliotèk vodar provintz un dena machansaz an account. Azzaren nètt hatt, makar schraim a mail dar bibliotèk vo Lusérn un dena bartnsaz innschraim. I, in dise tang da huam, hám gevuntet an schümman libar boda hatt konsildjárt di Dacia Maraini, a groza belesa schraibaren. Dar hozat "Perché il bambino cuoce nella polenta" vodar schraibaren rumena Aglaja Veteranyi, auzgedrukht von Keller Edizioni un úbersetzt vodar Emanuela Cavallaro. I, balden hán zornirt zo lesa, hánnemar gevorst baz vor a stórdja 'z bart soin ummana pittnan sóllan titl. 'Z izmar khent in sint moi vatar boda hatt gemischt da súchan pult obar in heart vor urn in an groazan khezzl un miar hattamar gemacht di vort,

i pinme hërta gevórtet azzarse vorpenn. Insómma, i hánnen genump ombrómm dar hattmar parirt huamesch. Defàti, biz ànka iz a stórdja von an geléba bait von moi, hánne gevuntet moine vort vo khinn, moine intrúam aft daz sèll bode berat khent un bode hettat gebóllt lem vo groaz, di meravédja afte naïng schümman sachandar boda 'z lem, alle tage, zoagetaz azpar lirnén schaug un vennense. Disar libar iz a viazo durch 'z lem. Èkko, azzar nètt boazt baz zo tüana, lest, disan un ándre libadar, kontàrt stórdje in khindar, schauget di bèlt auz von vestar, un alle tage, alle di momént bodar lazzt gian in pensiaro, machtar an viazo ena zo giana auz von haus. An mánat geat bahémme, dena barpar bidar áhevan zo loava un zo lamentàranaz vodar zait bodaz mengl zo stiana pitt únsarn laüt un zo pensàra atz ús. Èkko, nützpàr disa zait bobar nètt hám gesüacht ma bobaraz mang gödàrn, stianante stille.

(n.g.)

# Dar hümbiring dòpo in temporàl



I halt ke alle gedenkpar benn, tra in sèksunzbuantzekh un in draitzekh von otóbre zboatausankhunachtzane, dar temporàl Vaia un darzúar dar birblbint boda iz geríft obar alln in Triveneto un hatt gemacht toate un an groazan schade. Laidar únsar Zimbar Earde o hatta gehànk de mèzo, lai inn in Vesan soinda khent umgemèkkt sintzekhtausankh mètre kube gehültz, ma Lusérn o hatta sontàrt pitt achtzekhtausankh mètre kube umgedjukht. Però Lusérn un Leve soin lai intervenirt zo nemma in di hent di situatzióng un hám augenump ettlane manèkkar (di meararstn vert imprese vodar únsar earde) zo maga putzan au di beldar in da khürtzarste zait boma mage. 'Z gehültz boma mak aunemmen khint getrakk un vorkhoaft in gántz Beleschlànt un in ándre lentar o, azpe Österráich un Slovenia. Alla disa arbat hatt gemacht sàmmln in a djar alúmna in sintzekh vor-hundart vo allz 'z holtz boda iz khent nidargemèkkt, vil mearar in confronto vo ándre saitn. Nonostànte allz saibarsan nonet auzkhent, allz 'z gehültz boda est iz a dispositzióng hatt gemacht gian nidar di prezzì boda soin gánt vo sèchtzekh/ sintzekh a zen, odar mindar o, èuro a tonnellata, ditza hatt zuargezoget di tschinésan o boda bólln an gebinn. Darzúar alle dise èlbar danidar soin dar djúst pòst vor di coleotteri scolitidi, boda machan di óala untar in schintln un spetar di kóssan boda khemmen auz vrèzzan 'z holtz. Dar lest lángez iz gest khalt un molkat ma, azta di mánat boda khemmen beratn bermar un trükhnar, beratnda ploaz kóssan boda gianatn zo schupàra daz gesünt holtz o un ditza berat a groazan schade, èkko ombrómm ma mocht schaug zo putza daz vaul holtz o. 'Z izta zo khóda infine ke di èlbarn pinn burtzan haltn panàndar di earde, dòpo daz sèll boda iz vürkhent soinda vil saitn boda ristschàrn slavin un smottamenti. Vor ditza dòpo augeputzt mochtma schaug zo setza di tschümpla in alle di saitn boma hatt màngl. An lestn però di stadjóng turistica iz gánt gerecht, di kamoündarn hám gekhànt richtn her allz un nà bazta khön di esperti, ànka azzar hatt mengl soi zait, dar balt bart kreschàrn un bart vürkhemmen no pezzar baz vorànahì, grazie inar naïge biodiversità, a peste earde un stercharste burtzan.


Gabriele A.

# Quarantena, alle da huam

In di lestn tang, ormài soinz khennt bochan, dar presidente von consiglio Giuseppe Conte hattaz an earstn gipittet un spetar gischafft z'stiana da huam, zoa zo limitàra di diffusióng von "corona virus", azpe dar boazt sichar alle, a virus, boda iz khent zuar vodar Cina un iz nà zo vānga da gántz bèlt un mearar baz alle 'z Beleschlànt. 'Z izzaz khennt khótt z'stiana alle in quarantena, da huam ena zo giana auz un ena z'sega niamat. Sinamài vil boténg hám gispèrrt un vil laüt soin khennt geschikht da huam ena z'arbata. Un allz ditza a boch vor dar sait nà zo lesa disan djornàl. 'Z iz loune stian da huam un ma bóllat gian auz zo divertirase pinn tschelln, però oltre zo maga vāngen in virus, ristschàrtma zo gebanen vürsnen in únsarn paréntn. Vor ditza un vor rispetto

von dökhtür o, boda arbatn 24 urn atn tage zo macha khemmen gisùnt di laüt. Un pròpio durànte disar quarantena izmar khent in sint ke bar nützan alle ditza bort però vil, un i o, bizzan nètt vo bo 'z khinnt un umbrómm ma khótt asó. Da earst bötta 'z bort iz khennt ginüzt in viartzante seculo, durànte dar sbartz pèste, balda di laüt boda hám gibóllt gian in di Repubblica vo Venezia, soin an earstn khennt inngispèrrt vor viartzekhtang z'sega bisa beratn darkránkht odar nètt. Ditza iz khennt gimacht vor di barkn boda soin khennt von lentar boda sa iz gest di pèste o. Disa kránkhait hatt gitóatet an groazan toal laüt in Európa un in da gántz bèlt. Di quarantena, spèrrn inn di laüt vor viartzekhtang, iz khennt o ginüzt vor ándre kránkhaitn azpe di lebbra, dar colera un daz gel viavar.

In Englànd o izta khennt gimacht a quarantena vor di vichar azpe hunt un khatzan. Umbrómm sa soinse givórtet ke di vichar boda soin khennt von an àndarn lànt, hebatn gimak prengen di rabbia in lànt. Asó alle di vichar hám gemocht an earstn khemmen inngispèrrt vor sèks mánat, z'sega bisa soin gest gisùnt. 'Z iz però sa vo zbuantzekh djar boda ditza sachan khinnt niméar gimacht, umbrómm alle di vichar zo halta da huam vāngen a kart von veterinàrdjo, boda iz gischribet bisa soin gisùnt odar nètt. Vil vert di astronàutn o, dòpo azza soin gánt atn mà odar ummar pa bèltn, balsa khemmen bidrúmm, khemmen gilekk in quarantena. I speràr azta di laüt azpe i, boda nètt hám gibizt vo bo 'z khinta ditza bort,



hám gilirnt eppaz naïgez un billaz lai gidenkhan ke, ànka az mage soin loune mochan stian da huam, iz zo khemma auz vo disarn situatzióng pellar boma mage.

Únsarn non hámnen givorst zo giana in kriage, ús vorsansaz lai zo stiana da huam atn kanapé.

An gruaz, Samuel Pedrazza